

Jaunaren Bataioa (B)

LEHENENGO IRAKURGAIA

Hona hemen nire zerbitzaria, atsegin dudana.

Isaias liburutik 42, 1-4. 6-7

Jaunak dio:

«Hona hemen nire zerbitzaria,
nik eusten diodana,
nik hautatua, atsegin dudana.

Beronen gain ezarri dut
neure espiritua:
nazioei justizia ekarriko die.

Ez du oihu egingo,
ez ahotsa goratuko,
ez kaleetan bere mintzoa
entzunaraziko.

Kanabera printzatua ez du hautsiko,
ahulduriko argi-metxa
ez du itzaliko.

Justizia ekarriko du leialki.

Ez du adorea galduko, ez etsiko,
lurrean justizia ezarri arte.

Haren legearen zain egongo dira
urrutiko herriak».

«Nik, Jaun honek,
salbamen-ekintzarako dei egin dizut
eta eskutik heldu;
nik eratu zaitut
eta egiteko hau ezarri:
herriarentzat nire ituna berritu
eta nazioei argi egitea,
itsuen begiak zabaldu

eta presoak espetxetik ateratzea,
ilunpetan bizi direnak kartzelatik.

Jaunak esana.

Edo.

Etorri uretara; entzudazue eta biziko zarete.

Isaias liburutik 55, 1-11

Horrela dio Jaunak:

«Egarri zareten guztiok,
etorri uretara,
etorri, dirurik ez duzuenok ere!

Etorri, hartu garia eta jan,
hartu ardoa eta esnea,
dena hutsean, ordaindu gabe.

Zergatik gastatu zeuen dirua
goserik utziko zaituzten janaritan,
eta lansaria
aseko ez zaituzteten gauzetan?

Entzun niri arretaz,
eta ongi jango duzue,
janari gozo mamitsuz
elikatuko zarete.

Etorri niregana eta egon adi,
entzudazue eta biziko zarete.

Betiko ituna egingo dut zuekin,
Davidi eginiko
maitasunezko agintzariari
leial eutsiz.

Nik herrientzako testigu
jarri nuen hura,
nazioen buruzagi eta agintari.

Zuk herri ezezagunei
egingo diezu dei,
eta ezagutzen ez zintuzten herriek
zuregana joko dute lasterka,
nik, zure Jaunak,
Israelen Jainko santu honek,
ospez jantzi zaitudalako».

Bila ezazue Jauna,
aurki dezakezue eta;
egiozue dei, hurbil duzue eta.

Utz beza gaiztoak bere bidea,
gaizkileak bere asmo txarrak.

Bihur dadila Jaunarengana,
gupidaz hartuko baitu;
bihurtu gure Jainkoarengana,
guztiz barkabera baita.

Hau dio Jaunak:

«Egiaz, nire egitasmoak
ez dira zuenak bezalakoak,
ezta nire jokabidea ere
zuen bezalakoa.

Nola zerua lurraren gainetik garai,
halaxe nire jokabidea
zuenaren gainetik
eta nire egitasmoak zuenen gainetik.

«Euria eta elurra zerutik jaitsi
eta ez dira bertara itzultzen,
lurra urez ase gabe,
emankor bihurtu
eta ernamuindu gabe,
ereiteko hazia
eta jateko ogia sor ditzan;
berdin nire ahotik irtendako
hitza ere:
ez da niregana itzultzen
bere eragina izan gabe,

baizik eta nik nahi dudana egiten du
eta nik ezarritako helburua
betetzen».

Jaunak esana.

SALMOA

Salmoa 28, 1a y 2. 3ac-4. y 9b-10 (R.: 11b)

R.

Jaunak bere herria bakeaz bedeinka dezala!

Goretsi Jauna, zeruko izakiok,
goretsi Jaunaren izen ospetsua!

Ahuspeztu Jaunaren aurrean, bere santutasunez agertzean! **R.**

Jaunaren ahotsak ur gainean durunda:

Jauna ur handien gainean garai.

Jaunaren ahotsa indartsu,
Jaunaren ahotsa arrandiatsu. **R.**

Haren zeruko tenpluan denek oihu: «Gora!»

Jauna eseria dago ur handien gainetik,
Jauna tronuan eseria, betiko errege. **R.**

Edo.

Salmoa Is 12,2-3.4bcd.5-6

R.

*Pozik joango zarete zuek ere
salbamen-iturritik ura edatera.*

Bai, Jainkoa dut salbatzaile!

Harengan dut uste on
eta ez naiz beldur.

Jauna dut indar eta babes,
bera salbatzaile».

Pozik joango zarete zuek ere
salbamen-iturritik ura edatera. **R.**

«Goretsazue Jauna,
dei egin berari,
iragarri haren egintzak herriei!

Ezagutarazi zeinen bikain den! **R.**

Kanta Jaunari,
gauza harrigarriak egin baititu;
mundu osoan jakin bezate
haren berri.

Egin poz-irrintzi eta oihu,
Siongo bizilagunok,
handikiro ari baita zuen alde
Israelgo Santua». **R.**

BIGARREN IRAKURGAIA

Jainkoak Espiritu Santuaz eta indarrez gantzutu zuen.

Eginak liburutik 10, 34-38

Orduan, honela mintzatu zen Pedro:

«Orain jabetzen naiz benetan Jainkoak ez duela bereizketarik egiten, baizik eta berari begirune dion eta beraren nahia betetzen duen edonor duela gogoko, herri batekoa nahiz bestekoa izan. Hark bere mezua bidali die israeldarrei, guztien Jauna den Jesu Kristoren bidez bakearen berri ona iragarritz.

Badakizue, Galilean hasi eta Judea osoan, Joanek predikatu eta bataiatu ondoren, gertatu zena, Nazaretoko Jesusena, alegia: Jainkoak Espiritu Santuaz eta indarrez gantzutu zuen, eta hark on egiten eta deabruaren menpe zeuden guztiak sendatzen igaro zuen bere bizitza, Jainkoa berekin baitzuen.»

Jaunak esana.

Edo.

El espíritu, el agua y la sangre.

San Joan egindako lehenengo gutunetik 5, 1-9

Senide maiteok:

Jesus Mesias dela sinesten duen oro Jainkoarengandik jaioa da, eta aita maite duenak beraren seme-alabak ere maite ditu.

Beraz, Jainkoa maitatu eta beraren aginduak betetzen baditugu, ziur dakigu Jainkoaren seme-alabak ere maite dituguna. Izan ere, Jainkoa maitatzea haren aginduak betetzea da. Haren aginduak ez dira astunak, Jainkoarengandik jaio den orok garaitu egiten baitu mundua. Eta munduaren gain garaipena ematen diguna gure sinesmena da.

Zeren, nork garaitzen du mundua, Jesus Jainkoaren Seme dela sinesten duenak baizik?

Jesu Kristo bataioko uraz eta heriotzako odolaz etorri zen; ez zen uraz bakarrik etorri, uraz eta odolaz baizik. Eta Espiritua da horren testigantza egiten duena, Espiritua egia baita.

Hiru dira, bada, testigantza egiten dutenak: Espiritua, ura eta odola, eta hirurok bat datoz. Gizakien testigantza onartzen baldin badugu, are indartsuagoa da Jainkoaren testigantza, eta Jainkoak bere Semearen alde egin du testigantza.

Jaunak esana.

Aleluia Cf. Mc 9, 7

Aleluia, aleluia.

Hodei batek estali zituen eta mintzo hau izan zen hodeitik:
«Hauxe dut neure Seme maitea. Entzun berari!» Aleluia.

EBANJELIOA

Zu zaitut neure Semea, neure maitea, zu zaitut atsegin.

+ Jesu Kristoren Ebanjelioa san Marcos liburutik 1, 7-11

Denbora haietan, Joan Honela hots egiten zuen:

«Nire ondoren dator ni baino ahaltsuago dena, eta ni ez naiz inor makurtu eta haren oinetakoen lokarriak askatzeko ere.

Nik urez bataiatu zaituztet; hark, ordea, Espiritu Santuaz bataiatuko zaituzte».

Egun haietako batean, Jesus etorri zen Galileako Nazaretetik, eta Joanek bataiatu egin zuen Jordanen. Jesusek, uretatik ateratzerakoan, zerua urratzen ikusi zuen eta Espiritua, uso-tankeran, beregana jaisten.

Eta mintzo hau etorri zen zerutik: «Zu zaitut neure Semea, neure maitea, zu zaitut atsegin».

Jaunak esana.

Blog: <https://homiliaspagola.blogspot.com/>